

ԱՐՄԱՆ ԵՂԻԱԶԱՐՅԱՆ

պատմական գիտ. դոկտոր

ՀԱՅՈՑ ՍՄԲԱՏ Ա. ԹԱԳԱՎՈՐԻ ԳԱՀԱԿԱԼՈՒԹՅԱՆ ՇՐՋԱՆԻ ԺԱՄԱՆԱԿԱԳՐՈՒԹՅՈՒՆԸ

Հայոց Սմբատ Ա. թագավորի գահակալության շրջանը հայ պատմագիտության մեջ ավանդաբար թվագրվել է 890-914 թթ.¹: Նրա գահակալության օրոք տեղի ունեցած բազմաթիվ իրադարձություններ հաճախ ներկայացվել են հենց վերոհիշյալ ժամանակահատվածի շրջանակում: 890-914 թթ. միջակայքը կազմում է 24/25 տարի, որը հակասում է Սմբատ Ա.-ի գահակալության տարիների վերաբերյալ ժամանակակից Կաթողիկոս եւ պատմիչ Հովհաննես Դրասխանակերտցու տեղեկությանը: Բացի այդ, երբեմն կասկածի տակ են առնվել ինչպես Սմբատի՝ 890 թ. գահ բարձրանալու, այնպես եւ՝ 914 թ. վախճանվելու տեսակետները: Այսպիսով, կարելի է Սմբատ Ա.-ի գահ բարձրանալու եւ մահվան թվականների ճշգրտումն ու նրա օրոք տեղի ունեցած իրադարձությունների ժամանակագրության հստակեցումը:

Հովհաննես Դրասխանակերտցու տեղեկության համաձայն՝ Սմբատ Ա. թագավորել է 22 տարի՝ կյանքի վերջին շուրջ մեկ տարին անցկացնելով գերության մեջ²: Պատմիչը, ցավոք, Սմբատի գահ բարձրանալու եւ թագավորության շրջանի վերաբերյալ որեւէ ժամանակագրական տեղեկություն չի հաղորդում: Միակ բացառությունը հայոց 358 թ. (909/910) Ատրպատականի ամիրա Յուսուֆի արշավանքի վերաբերյալ տեղեկությունն է, որին եւ պատմիչի նկարագրած հետագա իրադարձությունների ժամանակագրությանը կանդրադառնանք ստորեւ:

Պատմիչներից շատերը բավարարվում են միայն Աշոտ Ա. թագավորի վախճանվելուց հետո Սմբատի գահ բարձրանալը հիշատակելով, ինչպես նաեւ նրա մահվան թվականի մասին տեղեկություններ հաղորդելով:

Թովմա Արծրունին տեղեկացնում է, որ Աշոտ Ա.-ն վախճանվել է «ՅԼԹ. թուականութեան Հայոց (իմա՝ 339 թ.՝ 890 թ. ապրիլ - 891 թ. ապրիլ - Ա. Ե.) եւ ի ԺԵ. (15) ամի հայրապետութեանն Գեորգեայ Հայոց Կաթողիկոսի»³: Ըստ որում Դվինի երկրաշարժը տեղի է ունեցել Սմբատ Ա.-ի թագավորության եր-

1 Տե՛ս Միքայել Չալչեանց, Պատմություն Հայոց ի սկզբանէ աշխարհի մինչեւ ցամ 1784, հ. Բ., Վենետիկ, 1785, էջ 707-708, 756-757:

2 Տե՛ս «Յովհաննու Կաթողիկոսի Դրասխանակերտցոյ Պատմություն Հայոց», «Մատենագիրք Հայոց», ԺԱ. հատոր, Ժ. դար, Պատմագրություն, Անթիլիաս-Լիբանան, 2010, էջ 505-506:

3 Թովմա Արծրունի եւ Անանուն, Պատմություն տանն Արծրունեաց, Երևան, 1985, էջ 356:

րորդ տարում⁴: 876 թ. Կաթողիկոս դարձած⁵ Գեորգ Գառնեցու հայրապետության 15-րդ տարին 891 թվականն է, որը համապատասխանում է Աշոտի մահվան թվականի հետ կապված հիշատակությանը: Ըստ Թովմա Արծրունու՝ Գեորգ Գառնեցին վախճանվել է հայոց 347 թ. (898/899), իսկ նրան փոխարինած Մաշտոց Կաթողիկոսն աթոռակալել է 8 կամ 9 ամիս⁶: Պատմիչի մյուս ժամանակագրական տեղեկությունը վերաբերում է Մանագլերտում հաստատված արաբ կայսիկների ապստամբությանը, որը ճնշվել է հայոց 351 թ. (902/903)⁷: Հաջորդ տարի, թերեւս 903 թ. Սմբատ Ա.-ի դեմ ելույթ ունեցավ Սյունյաց Սմբատ իշխանը, որն ամրացավ Վայոց ձորի ամրոցներում, սակայն Վասպուրականի Աշոտ իշխանի միջնորդությամբ դարձյալ հնազանդվեց Հայոց թագավորին⁸:

Ըստ Ասողիկի՝ Սմբատը թագավոր է դարձել հայոց ՅԽ. թվականին (340 թ.՝ 891 թ. ապրիլ - 892 թ. ապրիլ) եւ թագավորել 24 տարի: Գեորգ Կաթողիկոսը վախճանվել է հայոց 346 թ. (897 թ. ապրիլ - 898 թ. ապրիլ): Հովհաննես Դրասխանակերտցին Կաթողիկոս է դարձել նույն՝ հայոց 346 թ. կամ 897/898 թ.⁹: Վերջապես, ըստ Ասողիկի՝ Սմբատ Ա.-ն սպանվել է հայոց 364 թ., այսինքն՝ 915/916 թ.¹⁰:

Մովսես Դասխուրանցին Սմբատ Ա.-ի մահը թվագրում է հայոց 363 թ. (914/915), իսկ Գեորգ Գառնեցու մահը՝ հայոց 346 թ. (897/898)¹¹:

Ստեփաննոս Օրբելյանն Ատրպատականի Յուսուֆ ամիրայի արշավանքի սկիզբը դնում է հայոց 358 թ., այսինքն՝ 909/910 թ., իսկ Սմբատի մահը՝ հայոց 362 թ., այսինքն՝ 913/914 թ.¹²:

Ըստ Սամվել Անեցու՝ Աշոտ Ա.-ի մահը վրա է հասել նրա իշխանության 36-րդ տարում եւ թվագրված է փրկչական ՊՂԱ. (891) եւ հայոց ՅԼԸ. (338 թ.՝ 889/890) թվականով, Բյուզանդիայի Լեւոն Զ. կայսեր (886-912) իշխանության չորրորդ ու Գեորգ Բ. Գառնեցի Կաթողիկոսի գահակալության 15-րդ տարով: Ըստ Սամվել Անեցու՝ Գեորգ Բ. Գառնեցի Կաթողիկոսի գահակալության առաջին տարին հայոց 324 թվականն էր, այսինքն՝ 875/876 թ.: Աշոտի մահը տեղի է ունեցել Բյուզանդիայի Լեւոն Զ. կայսեր գահակալության 4-րդ տարում (890/891): Նույն թվականին գահ բարձրացած Սմբատի թագավորության

4 Տե՛ս անդ:

5 Տե՛ս Դ. Ալիշան, Յուշիկը հայրենեաց Հայոց, հ. Ա., Վենետիկ, 1869, էջ 475:

6 Տե՛ս Թովմա Արծրունի եւ Անանուն, էջ 376:

7 Տե՛ս անդ, էջ 380-382:

8 Տե՛ս անդ, էջ 382-384:

9 Տե՛ս Ստեփաննոս Տառանեցի Ասողիկ, Պատմություն տիեզերական, «Մատենագիրք Հայոց», ԺԵ. հատոր, Ժ. դար, Պատմագրություն, գիրք Բ., Երևան, 2011, էջ 741:

10 Տե՛ս անդ, էջ 745:

11 Տե՛ս Մովսես Կաղանկատուացի, Պատմություն Աղուանից աշխարհի, քննական բնագիրը եւ ներածությունը Վ. Առաքելյանի, Երևան, 1983, էջ 337:

12 Տե՛ս «Պատմություն նահանգին Սիսական, արարեալ Ստեփաննոսի Օրբելյան արքեպիսկոպոսի Սիւնեաց», Թիֆլիս, 1910, գլ. 38:

առաջին տարին, սակայն, համապատասխանում է Կաթողիկոսի գահակալության 16-րդ տարուն, այսինքն՝ 892 թ.¹³:

Վարդան վարդապետը տեղեկացնում է, թե Սմբատը գահ է բարձրացել 344 թ. (895/896) եւ իշխել 24 տարի¹⁴: Թվականը սխալ է, որ, թերեւս, պետք է սրբագրել եւ դարձնել 340 թ. (891/892):

Ըստ Կիրակոս Գանձակեցու՝ Սմբատ Ա.-ն թագավորել է 24 տարի¹⁵:

Սմբատին թագավորության 24 տարի է վերագրում նաեւ Մխիթար Այրիվանեցին¹⁶, նրա մահը թվագրելով 913 թ.¹⁷:

Սանահինի վանքի հիշատակարանում նշված է, որ «զկնի Աշոտոյ (իմս' Աշոտ Ա. - Ա. Ե.) ՅԻ. (340 թ.՝ 891/892 - Ա. Ե.) թուականին թագաւորէ Սմայատ որդին նորա, տիրելով բոլոր հայրենեաց իւրոց Հայոց եւ Վրաց եւ Ժառանգելով զքաղաքս հակառակորդաց»¹⁸:

Դավիթ Բաղիշեցու ժամանակագրության մեջ Սմբատ Ա.-ի թագադրության թվական է համարվում 891 թ., իսկ թագավորության տարիների քանակը նշված է 24¹⁹:

Ջվանշերը տեղեկացնում է, որ Սմբատը Յուսուֆի կողմից գերվելուց հետո կոտանքների է ենթարկվել մեկ ամբողջ տարի²⁰:

Աշոտ Ա.-ի եւ Սմբատ Ա.-ի վերաբերյալ տեղեկություններ են պահպանվել նաեւ Միքայել Ասորու երկում: Նա հաղորդում է, որ Աշոտն իշխել է 40 տարի, իսկ Սմբատ Ա.-ն թագավորել է հայոց 339 թվականից (890 թ. ապրիլ - 891 թ. ապրիլ) սկսած՝ 22 տարի: Ժամանակագիրը տեղեկացնում է նաեւ, որ Սմբատի թագավորության 22-րդ տարուն, որը հայոց 360 (911/912) թվականն էր, Ատրպատականի ամիրա Յուսուֆը ներխուժեց Հայաստան: Նույն թվականին Միքայել Ասորին դնում է Սմբատ Ա.-ի մահը²¹:

Սմբատ Ա.-ի՝ 24 տարի իշխելու վերաբերյալ հիշատակում են նաեւ հայկական հիշատակարանները²²:

13 Տե՛ս **Սամուէլ Անեցի**, Հաւաքմունք ի գրոց պատմագրաց յաղագս գիտի ժամանակաց անցելոց մինչեւ ի ներկայս ծայրաքաղ արարեալ, բնագիրը կազմեց Ա. Հայրապետեանը, Երեւան, 2011, էջ 115:

14 Տե՛ս «Հաւաքումն պատմութեան Վարդանայ վարդապետի», Վենետիկ, 1862, էջ 86:

15 Տե՛ս «Կիրակոսի վարդապետի Գանձակեցոյ համառօտ պատմութիւն ի սրբոյն Գրիգորէ ցաւորս իւր լուսարանեալ», Վենետիկ, 1865, էջ 45:

16 Տե՛ս «Մխիթարայ Այրիվանեցոյ Պատմութիւն ժամանակագրական», ի լոյս ընծայեաց Բ. Պ., Ս. Պետերբուրգ, 1867, էջ 19:

17 Տե՛ս անդ, էջ 71:

18 «Յիշատակարան Սանահնոյ վանից (Սանահինի քեթօռուկը)», աշխատ.՝ Պ. Մուրադեանի, Ս. Էջմիածին, 2007, էջ 50:

19 Տե՛ս «Մանր ժամանակագրություններ (XIII-XVIII դդ.)», հ. II, կազմեց Վ. Հակոբյան, Երեւան, 1956, էջ 336:

20 Տե՛ս «Համառօտ պատմութիւն Վրաց ընծայեալ Զուանշերի պատմի», Վենետիկ, 1884, էջ 107:

21 Տե՛ս "Chronique de Michel le Syrien patriarche Jacobite D'Antioche (1166-1199)", Éditée pour la première fois et traduite en français par J.-B. Chabot, t. III, Paris, 1905, էջ 514-516:

22 Տե՛ս **Գարեգին Ա. Կաթողիկոս**, Յիշատակարանը ձեռագրաց, հ. Ա. (Ե. դարից մինչեւ 1250 թ.), 48 նմանահանություններով, Անթիլիաս, 1951, էջ 87:

Հ. Մանանդյանը եւ Ռ. Մաթեոսյանը Սմբատ Ա.-ի թագավորության տարիների հարցում հենվում են ավանդական՝ 890-914 թթ. թվագրման վրա²³: Հ. Թովիցյանի տեսակետի համաձայն՝ Սմբատ Ա.-ի թագավորությունը սկիզբ է առել 891 թ.²⁴: Ն. Ադոնցը կարծում է, որ Սմբատը գահ է բարձրացել 890 թ. եւ իշխել մինչեւ 913 թ.: Իսկ 891 թ. նրա թագավորության առաջին տարին էր²⁵: Հ. Հարությունյանը կարծում է, որ Աշոտ Ա.-ն մահացել է 890 թ., իսկ Սմբատը հայոց թագավոր է օծվել 891 թ.²⁶: Ի վերջո, սակայն, նա Սմբատ Ա.-ի թագավորությունը թվագրում է 890-914 թթ.²⁷: Ա. Տեր-Ղեւոնդյանը թեեւ նշում է, որ Սմբատ Ա.-ն թագավորել է 890-913 թթ., սակայն հավելում է, որ Ափշինը նրան թագ է բերել 892 թ.²⁸:

Փաստորեն, կարող ենք նշել, որ Սմբատ Ա.-ի գահակալության սկիզբը 890 թ. համարող հեղինակների մեկնակետն այն է եղել, որ նա գահ է բարձրացել հայոց 339 թ.՝ Աշոտ Ա.-ի մահից հետո: Հայոց 339 թ. սկսվել է 890 թ. ապրիլին եւ ավարտվել 891 թ. ապրիլին: Թվում է, թե մյուս պատմիչների կողմից Սմբատ Ա.-ին 24 տարվա թագավորություն վերագրելը բխում է այն իրողությունից, որ հայոց 339 թ. նրանք միանշանակորեն նույնացրել են 890 թվականի հետ: Իսկ քանի որ Սմբատ Ա.-ն սպանվել է 913 թ., ապա 890-913 թթ. միջակայքը հաշվարկվում է 23-24 տարի: Որոշ հեղինակներ էլ, Սմբատ Ա.-ի թագավորության 24 տարիները գումարելով 890-ին, ստացել են 914 թ.:

Արդ, սկզբում փորձենք ճշտել Սմբատ Ա.-ի գահ բարձրանալու թվականը: Դատելով Հովհաննես Դրասխանակերտցու տեղեկություններից՝ Սմբատը ներկա չի եղել Աշոտ Ա. թագավորի թաղմանը, քանի որ գտնվում էր Գուգարքում²⁹: Հոր մահվան լուրը ստանալով՝ նա վերադառնում է, սակայն գժտվում հորեղբոր՝ Աբասի հետ: Աբասը ձերբակալել էր Կղարջքի Ատրներսեհ կուրապաղատին: Կաթողիկոսի միջնորդությունը զուր է անցնում, որի հետեւանքով Սմբատը հեծելագործով գրոհում է Աբասի տիրույթների վրա: Աբասն Ատրներսեհին ստիպված ազատ է արձակում, որը մեկնում է իր տիրույթները: Այնուհետեւ, Ատրպատականի Ափշին ամիրան խալիֆայի հրամանով թագավորական թագ է բերում Սմբատին, եւ նա օծվում է Հայոց թագավոր: Հովհաննես

23 Տե՛ս Հ. Մանանդյան, Քննական տեսություն հայ ժողովրդի պատմության, Կ. Բ., Բ. մասի նյութեր, Երևան, 1960, էջ 40-43: Հ. Մանանդյանը Սմբատ Ա.-ի թագավորության տարիների թվագրման հարցում տարբեր կարծիքներ է ներկայացրել: Մեկ այլ տեղում Սմբատ Ա.-ի թագավորությունը նա թվագրել է 891-914 թթ. (անդ, էջ 64): Ռ. Մաթեոսյան, Բագրատունյաց Հայաստանի պետական կառուցվածքն ու վարչական կարգը, Երևան, 1990, էջ 100:

24 Տե՛ս H. Thopdschian, Politische und Kirchengeschichte Armeniens unter Asot I und Smbat I. "Mitteilungen des Seminars für Orientalische Sprachen", Westasiatische Abt. 8, 1905, էջ 166:

25 Տե՛ս Ն. Ադոնց, Երկեր, Կ. Ե., Երևան, 2012, էջ 190-191:

26 Տե՛ս Հ. Հարությունյան, Հայաստանը IX-XI դարերում, Երևան, 1959, էջ 38:

27 Տե՛ս անդ, էջ 146:

28 Տե՛ս A. Тер-Гевондян, Армения и Арабский халифат, Е., 1977, էջ 240. Նաեւ՝ «Հայ ժողովրդի պատմություն», ՀՍՍՀ ԳԱԱ հրատ., Կ III, Երևան, 1976, էջ 27:

29 Տե՛ս Հովհաննես Դրասխանակերտցի, էջ 446:

Դրասխանակերտցին այս իրադարձությունները նկարագրում է համառոտ, մեկ շնչով, միայն հավելելով, որ Սմբատի եւ Աբասի հակամարտությունը տեւել է «բազում ատուրս»³⁰: Բացի այդ, ակնհայտ է, որ Սմբատը սկզբում խալիֆայից թագ է ստացել, իսկ այնուհետեւ՝ անմիջապես կազմակերպել թագադրության հանդեսը:

Փաստորեն, անհրաժեշտություն է առաջանում ճշգրտելու Աշոտ Ա.-ի մահվան թվականը, որը հնարավորություն կտա հստակեցնելու Սմբատի գահ բարձրանալու տարին, քանի որ այդ երկու իրադարձության միջեւ երկար ժամանակ չէր անցել: Հարկ է նախապես նշել, որ այն հիմնականում տեղադրվում է 890 թ.³¹: Սակայն «Յայսմաուրք»-ի համաձայն՝ Աշոտ Ա.-ի հիշատակի (վախճանի) օրը նշվել է մարերի ամսի 21-ին³²: Դրա հիման վրա Ղ. Ալիշանն Աշոտ Ա. թագավորի մահը թվագրում է 891 թ. փետրվարի 1-ով³³: Խնդիրն այն է, որ աղբյուրների մի զգալի մասն Աշոտ Ա.-ի մահը թվագրում է հայոց 339 թ., իսկ այդ թվականի մարերի 20-ը համապատասխանում է 891 թ. փետրվարի 1-ին³⁴: Մ. Օրմանյանը ճշտում է մտցնում Ղ. Ալիշանի տեսակետի մեջ՝ նշելով, որ ըստ «Յայսմաուրք»-ի՝ Աշոտ Ա.-ի մահվան օրը հայոց 339 թ. մարերի 21-ն էր, այսինքն՝ 891 թ. փետրվարի 2-ը³⁵:

Աշոտ Ա.-ի մահվան եւ Սմբատի թագադրության թվականը հստակեցնելուն կարող է նպաստել նաեւ Դվինի երկրաշարժի ժամանակի ճշտումը, քանի որ հայտնի է, որ այն տեղի է ունեցել Սմբատ Ա.-ի գահակալման երրորդ տարում³⁶: Պատմագիտության մեջ երբեմն արտահայտվել է այն տեսակետը, թե Դվինի երկրաշարժը տեղի է ունեցել 893 թվականին³⁷: Դեպքերի ժամանակակից Մաշտոց Եղիվարդեցու վարքում հստակեցվում է երկրաշարժի ժամանակը՝ հայոց ՅՆԲ. թվականի հրոտից ամսվա ԺԶ. (16), հինգշաբթի³⁸: Հայոց ՅՆԲ. թվականի (342 թ.՝ 893 թ. ապրիլ - 894 թ. ապրիլ) հրոտից ամսվա 16-ը համապատասխանում է 894 թ. մարտի 28-ին, որն իրոք հինգշաբթի էր³⁹: Մի

30 Անդ, էջ 446-448:

31 Տե՛ս Կ. Արոնց, Երկեր, հ. Ա., Երևան, 2006, էջ 447. Հ. Մանանդյան, Քննական տեսություն հայ ժողովրդի պատմության, հ. Բ., Բ. մասի նյութեր, էջ 39-40, 63-64. Լեո, Երկերի ժողովածու, հ. 2, Երևան, 1967, էջ 504-510. А. Тер-Гевондян, նշվ. աշխ., էջ 240 եւ այլն:

32 Տե՛ս «Յայսմաուրք», ըստ կարգի ընտրելագոյն օրինակի Յայսմաուրաց Տեր Իսրայելի, ի Կոստանդնուպոլիս, 1834, էջ 234:

33 Տե՛ս Ղ. Ալիշան, նշվ. աշխ., էջ 500:

34 Տե՛ս անդ, էջ 510:

35 Տե՛ս Մ. Օրմանյան, Ազգապատում, հ. Ա., Կոստանդնուպոլիս, 1913, էջ 993-994:

36 Տե՛ս Թովմա Արծրունի եւ Անանուն, էջ 354-360:

37 Տե՛ս Ղ. Ալիշան, նշվ. աշխ., էջ 463. Հ. Հարությունյան, նշվ. աշխ., էջ 156. «Հայ ժողովրդի պատմություն», հ. III, էջ 30 եւ այլն:

38 Տե՛ս «Հայերեն ձեռագրերի հիշատակարաններ (Ե.-ԺԲ. դարեր)», աշխատ.՝ Ա. Մաթեոսյանի, Երևան, 1988, էջ 41. «Էջմիածին» ամսագիր, 2011, Բ., էջ 68:

39 Ճշգրտումը կատարված է ըստ Բ. Թումանյանի տոմարական հաշվումների. տե՛ս Բ. Թումանյան, Տոմարական հաշվումներ. «Տեղեկագիր (հաս. գիտ.)», 1964, թ. 5, էջ 55-60:

Ավետարանում Դվինի երկրաշարժը թվագրված է հայոց 342 թ. (893/894)⁴⁰: Իբն ալ-Ասիրը հաղորդում է, որ Դվինի երկրաշարժը տեղի է ունեցել հիշրայի 280 թ. (23 մարտ, 893 թ. - 12 մարտ, 894 թ.) շավալ ամսին (14 դեկտեմբեր, 893 թ. - 11 հուլիս, 894 թ.)⁴¹: Անկախ ամսաթվից, խիստ հավանական է, որ երկրաշարժը տեղի է ունեցել 894 թ.: Այդ դեպքում Սմբատ Ա.-ի թագավորության առաջին տարին ստացվում է 891/892 թ.: Ավարտվում էր հայոց ՅԽԲ. (342) թվականը, որը, եթե Սմբատ Ա.-ի երրորդ տարին է, ապա երկրորդը՝ ՅԽԱ.-ն (341) է, իսկ առաջինը՝ ՅԽ. (340): Վերջինս սկսվել է 891 թ. ապրիլին եւ ավարտվել 892 թ. ապրիլին: Ի դեպ, չենք կարող համաձայնել Ա. Տեր-Ղևոնդյանի այն կարծիքին, որ Սմբատ Ա.-ն խալիֆայից թագ է ստացել գահ բարձրանալուց 2 տարի անց, քանի որ դա հակասում է Հովհաննես Դրասխանակերտցու տեղեկություններին: Աղբյուրներում, ամենայն հավանականությամբ, արձանագրվել է Սմբատի գահ բարձրանալը եւ ոչ թե խալիֆայից թագ ստանալը, թեեւ, դատելով Հովհաննես Դրասխանակերտցու տեղեկություններից, դրանք տեղի են ունեցել միաժամանակ: Մյուս կողմից՝ Սմբատը գահ է բարձրացել հոր մահից ոչ երկար ժամանակ անց, անկասկած, նույն թվականին:

Աշոտ Ա.-ի՝ 891 թ. վախճանվելու եւ Սմբատ Ա.-ի՝ նույն թվականին գահ բարձրանալու փաստն են ապացուցում նաեւ այլ իրողություններ: Հովհաննես Դրասխանակերտցին մի ուշագրավ վկայություն ունի այն մասին, որ Աբաս սպարապետն Աշոտ Ա.-ի մահից հետո Գուգարքից վերադարձած Սմբատից պահանջել է, որպեսզի Կղարքի կուրապաղատ Ատրներսեհին իրեն հանձնի իր քրոջ ամուսին Գուրգենի ձեռքից խլված երկու ամրոց⁴²: Ատրներսեհն ամրոցներ խլել կարող էր միայն Գուգարքում, իսկ Գուրգենը, անկասկած, Կղարքի Բագրատունիների ներկայացուցիչն էր: Հայտնի է, որ Կղարքի Աշոտ կուրապաղատի որդի Ատրներսեհի որդի Գուրգենը 881 թ. մարտնչում էր Կղարքի Ատրներսեհ կուրապաղատի եւ նրա հովանավոր իշխանաց իշխան Աշոտի դեմ՝ միանալով Գվարամ ու Նասր Բագրատունիների եւ Աբխազաց թագավորի դաշինքին⁴³: Նման երկրորդ հակամարտության ժամանակ, որը տեղի ունեցավ 888 թ., արդեն Աշոտ Ա.-ի գահակալության շրջանում, Գուրգենը միացավ հակառակորդ դաշինքին⁴⁴: Ըստ Դավթի որդի Սմբատի՝ Գուրգենը Տայքի Կալմախ ամրոցից տեղափոխվել էր Շավշք եւ Արտահան: Նա թշնամացել էր Կղարքի կուրապաղատ Ատրներսեհի հետ եւ 891 թ. ճակատամարտել նրա

40 Տե՛ս «Յիշատակարանք ձեռագրաց», հ. Ա., էջ 99-100:

41 Տե՛ս Իբն ալ-Ասիր. «Օտար աղբյուրները Հայաստանի եւ հայերի մասին», 11, «Արաբական աղբյուրներ», Բ., թարգմանություն բնագրից, առաջարան եւ ծանոթություններ՝ Ա. Տեր-Ղևոնդյանի, Երևան, 1981, էջ 171-172:

42 Տե՛ս Հովհաննես Դրասխանակերտցի, էջ 447:

43 Տե՛ս «Քարթլիի մատյան», թարգմ.՝ Վ. Մարտիրոսյանի եւ Հ. Մկրտումյանի, մաս Ա. «Լրաբեր (հաս. գիտ.)», 1989, թ. 9, էջ 64:

44 Տե՛ս անդ, էջ 65:

դեմ Արտահանում, պարտվել ու սպանվել⁴⁵: Ամենայն հավանականությամբ, սա այն Գուրգենն է, որի մասին հիշատակում է Հովհաննես Դրասխանակերտցին⁴⁶: Եթե ճիշտ է մեր դիտարկումը, ապա նրա երկու ամրոցները 891 թ. անցել էին Ատրնեբսեհին, որոնք պահանջում էր Աբասը:

Նման նույնացման արդյունքը համապատասխանում է մեր այն եզրակացությանը, որ Սմբատ Ա.-ն գահ է բարձրացել 891 թ.: Ըստ որում, եթե նա գահ է բարձրացել, Ատողիկի տեղեկության համաձայն, հայոց 340 թ., ապա այդ իրադարձությունը թվագրվում է 891 թ. ապրիլից 18-ից (հայոց ՅԽ. թվականի նավասարդի 1-ը⁴⁷) հետո: Ի միջի այլոց, Սմբատ Ա.-ի գահակալության թվականների հետ կապված դժվարությունները հաշվի առնելով՝ Ն. Ադոնցը, որ Աշոտ Ա.-ի մահը թվագրում է 890 թ.⁴⁸ եւ Սմբատ Ա.-ի թագավորության առաջին տարի համարում 891 թ., փորձել է խնդիրը լուծել նրա թագավորությունը թվագրելով հայկական թվականներով: Ըստ նրա՝ Սմբատ Ա.-ն վախճանվել է հայոց 361 թ. (912 թ. ապրիլ - 913 թ. ապրիլ)⁴⁹, թագավորելով հայոց 340 թ. սկսած: Ստացվում է, որ Սմբատ Ա.-ի թագավորությունը հայկական թվականներով թվագրվում է 340-361 թթ. (891/892-912/913):

Փաստորեն, Սմբատ Ա.-ն գահ է բարձրացել 891 թ. ապրիլի 18-ից ոչ շատ ուշ: Աշոտ Ա.-ի մահվան եւ Սմբատ Ա.-ի գահ բարձրանալու միջակայքը կազմում է մի քանի ամիս:

Այժմ անցնենք նրա գահակալության շրջանի իրադարձությունների ժամանակագրությանը: Այդ շրջանում տեղի ունեցած դեպքերի վերաբերյալ ճշգրիտ եւ մանրամասն ժամանակագրական հերթականությամբ տեղեկություններ է հաղորդում Հովհաննես Դրասխանակերտցին՝ առանց թվականների նշման: Միակ թվագրումը վերաբերում է Ատրպատականի ամիրա Յուսուֆի արշավանքին: Այն է՝ հայոց 358 թ. (909/910)⁵⁰: Ըստ Հովհաննես Դրասխանակերտցու՝ մինչեւ Դվինի երկրաշարժը տեղի են ունեցել մի քանի նշանակալից իրադարձություններ: Սկզբում Սմբատ Ա.-ն սերտացրել է կապերը Բյուզանդիայի հետ, որի պատճառով Ատրպատականի Ափշին ամիրան փորձել է ներխուժել Հայաստան: Սմբատը նրան ընդառաջ է ուղարկել 30 հազարանոց բանակ, եւ Ափշինը նահանջել է⁵¹: Այդ իրադարձությունը թերեւս տեղի է ունեցել 892 թ. եւ ոչ թե 893-ին, ինչպես ընդունված է կարծել⁵²: Ափշինի հետ

45 Տե՛ս **Сумбат Давитис-дзе**, История и повествование о Багратионах, пер. М. Лордкипанидзе, Тб., 1979, էջ 34. նաեւ՝ «Բարթիլի մատյան», էջ 64-65:

46 Տե՛ս **M. Brosset**, *Histoire de la Georgie, 1er partie*, S.-Petersbourg, 1849, էջ 274:

47 Տե՛ս **Հ. Բաղդյան**, Հայոց եւ հռոմեական տոմարները գուգակցելու մատչելի եղանակ. «Լրաբեր (հաս. գիտ.)», 1966, թ. 9, էջ 57-76:

48 Տե՛ս **Ն. Ադոնց**, Երկեր, հ. Ե., էջ 190:

49 Տե՛ս անդ, էջ 193:

50 Տե՛ս **Հովհաննես Դրասխանակերտցի**, էջ 489-490:

51 Տե՛ս անդ, էջ 455-456:

52 Տե՛ս «Հայ ժողովրդի պատմություն», հ. III, էջ 28:

հարցերը կարգավորելուց հետո Սմբատը նույն թվականին հնազանդեցրել է Դվինի արաբներին⁵³: Արտաքին եւ ներքին թշնամիների դեմ հաղթանակներից հետո Սմբատը նվաճել է Այսրկովկասյան երկրները⁵⁴ ամենայն հավանականությամբ 893 թ.: Այնուհետեւ 894 թ. տեղի ունեցավ Դվինի երկրաշարժը, որից անմիջապես հետո Ատրպատականի ամիրա Ափշինը հարձակվեց Հայոց թագավորության վրա, սակայն պարտություն կրեց Դոդսի ճակատամարտում⁵⁵: 894 թ. Սմբատ Ա.-ն թագադրեց Աղվանից Համամ իշխանին⁵⁶: Վասպուրականի Աշոտ իշխանը (896-905) լքում է Սմբատ Ա.-ին եւ մեկնում Ափշինի մոտ⁵⁷: Դրանից հետո, թերեւս Սմբատ Ա.-ի օգնությամբ⁵⁸, Վասպուրականին տիրում է Գագիկ Ապուրվանը, որը ձերբակալում է Աշոտին եւ նրա երկու եղբայրներին⁵⁹: Տարոնի Դավիթ իշխանը մահացավ Դվինի երկրաշարժից երկու տարի անց՝ 896 թ.⁶⁰, որից հետո Ամիդի ամիրան, հաղթելով նրան փոխարինած Գուրգենին, տիրեց Տարոնի իշխանությանը⁶¹: Դատելով Հովհաննես Դրասխանակերտցու եւ Թովմա Արծրունու տեղեկություններից՝ վերոհիշյալ իրադարձությունները տեղի են ունեցել 896 թվականին: Սմբատ Ա.-ն Ամիդի ամիրայից պահանջեց հեռանալ Տարոնից, սակայն վերջինս չկատարեց պահանջը: Հավանաբար, արդեն 897 թ. Սմբատի հրամանով հավաքվեցին հայոց, վրաց ու աղվանից զորքերը, եւ Հայոց արքան արշավանքի դուրս եկավ⁶²: Հայոց բանակը Գագիկ Ապուրվանի դավաճանության պատճառով ծանր պարտություն կրեց Թուլիս կոչվող գյուղի մոտ տեղի ունեցած ճակատամարտում⁶³: Օգտվելով Սմբատ Ա.-ի պարտությունից՝ Հայաստան է ներխուժում Ափշինը⁶⁴: Ամենայն հավանականությամբ, այդ իրադարձությունը տեղի է ունենում 897 թ.⁶⁵, քանի որ նույն տարվա վերջին (ձմռանը) մահացավ Գեորգ Կաթողիկոսը՝ գահակալելով 22 տարի (876-897/898)⁶⁶: Հաջորդ Կաթողիկոսը՝ Մաշտոցը

53 Տե՛ս Հովհաննես Դրասխանակերտցի, էջ 456-457, նաեւ՝ Հ. Հարությունյան, նշվ. աշխ., էջ 39-40:

54 Տե՛ս Հովհաննես Դրասխանակերտցի, էջ 457:

55 Տե՛ս անդ, էջ 462:

56 Տե՛ս Ա. Եղիազարյան, Հայոց Սմբատ Ա. թագավորի կողմից Աղվանից եւ Կղարջի իշխանների թագադրության հարցի շուրջ. «ԲԵՀ», «Հայագիտություն», 135.1., 2011, էջ 16-25:

57 Տե՛ս Հովհաննես Դրասխանակերտցի, էջ 463:

58 Տե՛ս Թովմա Արծրունի եւ Անանուն, էջ 362-364. «Պատմութիւն Անանուն Զրուցագրի (կարծեցեալ Շապուհ Բագրատունի)», թարգմանությունը գրաբարից, առաջաբանն ու ծանոթագրությունները՝ Մ. Հ. Կարքինյան-Մելիքյանի, Երևան, 1971, էջ 171:

59 Տե՛ս Հովհաննես Դրասխանակերտցի, էջ 464:

60 Տե՛ս Թովմա Արծրունի եւ Անանուն, էջ 356-358:

61 Տե՛ս Հովհաննես Դրասխանակերտցի, էջ 465:

62 Տե՛ս Թովմա Արծրունի եւ Անանուն, էջ 366-368:

63 Տե՛ս Հովհաննես Դրասխանակերտցի, էջ 466: Ըստ Մովսես Դասխուրանցու՝ Սմբատ Ա.-ի արշավանքն Ամիդի ամիրայության դեմ տեղի է ունեցել 893 թ. դեպքերից չորս տարի անց, այսինքն՝ 896/897 թ. (Մովսես Կաղանկատվացի, էջ 336):

64 Տե՛ս Հովհաննես Դրասխանակերտցի, էջ 467:

65 Ըստ Մովսես Դասխուրանցու՝ արշավանքը տեղի է ունեցել 897 թ., եւ նույն թվականին վախճանվել է Գեորգ Կաթողիկոսը. Մովսես Կաղանկատվացի, էջ 337:

66 Տե՛ս Հովհաննես Դրասխանակերտցի, էջ 469:

(898) մահացավ յոթ ամիս գահակալելուց հետո⁶⁷: Քանի որ Գեորգ Կաթողիկոսը մահացել էր 897 թ. վերջին (կամ 898 թ. սկզբին՝ ձմռանը), իսկ Մաշտոցը Կաթողիկոս դարձավ 898 թ. գարնանը⁶⁸, ուստի Մաշտոցի գահակալությունը պետք է ավարտված լինի 898 թ. վերջին, որից հետո կաթողիկոսական գահին բարձրացավ Հովհաննես Դրասխանակերտցին (898-929): Ինչպես տեսանք, ըստ Ասողիկի՝ Հովհաննես Դրասխանակերտցին Կաթողիկոս դարձավ նույն՝ հայոց 346 թ. կամ 897/898 թ.⁶⁹: Ըստ Հովհաննես Դրասխանակերտցու՝ Գեորգ Կաթողիկոսը վախճանվել է ձմռանը, իսկ Մաշտոց Կաթողիկոսը գահ է բարձրացել գարնանը եւ աթոռակալել 7 ամիս⁷⁰: Փաստորեն, Հովհաննես Դրասխանակերտցին, իրոք, կարող էր գահ բարձրանալ 898 թ.: Հովհաննես Դրասխանակերտցու գահ բարձրանալու տարին կառուցվեց արքայանիստ Երազգավորսի եկեղեցին: Ամենայն հավանականությամբ, արդեն 899 թվականին է վերաբերում Հովհաննես Դրասխանակերտցու այն վկայությունը, որ Սմբատ Ա.-ն, գնահատելով Կղարջքի կուրապաղատ Ատրներսեհի հավատարմությունը, նրան թագադրում է⁷¹: Կարելի է այն, որ հաղորդելով Ատրներսեհի թագադրության մասին՝ պատմիչը տեղեկացնում է, թե դրան հաջորդել է Ափշինի արշավանքը, թերեւս 900 թվականին⁷²:

Ափշինը որոշ ժամանակ ասպատակելով Հայաստանը եւ Վիրքը, ինչպես նաեւ փորձելով խաբեությամբ ձերբակալել Սմբատ Ա.-ին՝ հեռանում է Ատրպատական՝ Դվինում թողնելով իր որդուն եւ մեծ ներքինապետին: Տայքում ամրացած Սմբատ Ա.-ն վերադառնում է, հանդիպում մեծ ներքինապետին եւ հաշտվում նրա հետ, որից հետո Ափշինի որդուն նա շուրջ մեկ տարի ռոճիկ

67 Տե՛ս անդ, էջ 470:

68 Տե՛ս անդ, էջ 469-470:

69 Տե՛ս Ասողիկ, էջ 741:

70 Տե՛ս Հովհաննես Դրասխանակերտցի, էջ 469-470:

71 Անդ, էջ 471: Մ. Բրոսսեն, Ս. Երեմյանը, Ի. Զավախիշվիլին եւ Կ. Թումանովը Ատրներսեհի թագավոր դառնալը թվագրում են 888 թվականով. տե՛ս **M. Brosset**, նշվ. աշխ., էջ 273-279. **С. Еремян**, Присоединение северо-западных областей Армении к Византии в XI веке. «Լրաբեր հաս. գիտ.», 1971, թ. 3, էջ 5, ծան. 7. **Ի. Զավախիշվիլի**, Վրաց ժողովրդի պատմություն, II, Թբիլիսի, 1965, էջ 111 (վրացերեն). **C. Toumanoff**, The Bagratids of Iberia from the eight to the eleventh Century. "Le Museon", LXXIV, Louvain, 1961, էջ 21-25: Մ. Չամչանցը, Հ. Մարկվարտը, Ն. Ադոնցը, Է. Թադաշվիլին, Ե. Յազարեիշվիլին եւ Մ. Ճանաշյանը կարծում են, որ Ատրներսեհի թագադրությունը տեղի է ունեցել 899 թվականին. տե՛ս **Մ. Չամչանց**, նշվ. աշխ., 1985, էջ 727. «Հայ Բագրատունեաց ճիւղագրութիւնը», ծանոթություններով, գրեց պրոֆ. դկտ. Յ. Մարկուարտ, գերմաներեն թարգմանեց Հ. Մ. Հապոգեան, Վիեննա, 1913, էջ 148 (ներդիր). **Ն. Ադոնց**, Երկեր, հ. Ա., էջ 501. "Жизнь и известие о Багратидах, царях наших грузинских, откуда они явились в эту страну, или с какого времени владеют они царством Грузинским, которое написал Сумнат, сын Давида", пер. Е. Такайшвили. «Сборник материалов для описания местностей и племен Кавказа», вып. 28, Тифлис, 1900, էջ 83. «Հովհաննես Դրասխանակերտցու տեղեկությունները Վրաստանի մասին», հայերեն տեքստը վրացերեն թարգմանությամբ, ուսումնասիրությամբ եւ ծանոթագրություններով հրատ. Ե. Յազարեիշվիլին, Թբիլիսի, 1965, էջ 0121-0122 (վրացերեն). **Մ. Ճանաշյան**, Դաիթ կիւրապաղատ (պատմական ուսումնասիրություն), Վենետիկ, 1972, էջ 13-14: Ատրներսեհի թագադրությունը մոտավորապես տեղադրվել է նաեւ 906-908 թթ. միջև. տե՛ս «Հայ ժողովրդի պատմություն», հ. III, 1976, էջ 31-32:

72 Տե՛ս Հովհաննես Դրասխանակերտցի, էջ 472:

էր վճարում⁷³: Ռոմիկ վճարելու մեկ տարին, ամենայն հավանականությամբ, պետք է հաշվել 900 թ. կեսերից: Այնուհետև, հավանաբար 901 թ. մեծ ներքինապետը հեռանում է Հայաստանից՝ Սմբատ Ա.-ին հանձնելով նրա որդի Աշոտին եւ մյուս որդի Մուշեղի կնոջը, որոնք պատանդ էին պահվում իր մոտ: Այդ պատճառով 901 թ. Ափշինը կրկին որոշում է արշավել Հայաստան, սակայն ճանապարհին մահանում է⁷⁴:

Լսելով Ափշինի մահվան լուրը՝ Սմբատ Ա.-ն գրում է խալիֆային՝ խնդրելով թեթևացնել արքունի հարկը եւ «ի բաց զինքն հատանել յագգէ (իմա՛ Ատրպատականի արաբների - Ա. Ե.) յայնմանէ»⁷⁵: Խալիֆան համաձայնեց: Այդ մասին իմանալով՝ Յուսուֆն արշավեց Հայաստան, թերեւս 902 թ.: Սրա հետ էր հավանաբար կապված կայսիկների ապստամբությունը, ըստ Թովմա Արծրունու՝ 902 թ., որն արագորեն ճնշվեց: Սմբատը դիմադրություն կազմակերպեց Յուսուֆի դեմ, որը վերջինս հաղթահարել չկարողացավ եւ բանակցելու համար պատվիրակություն ուղարկեց: Կողմերն ընդհանուր հայտարարի եկան, որից հետո Սմբատը մեկնեց ձմեռելու Նախճրաձոր գյուղում, իսկ ոստիկանը՝ Դվինում: 903 թ. գարնանը Յուսուֆն առատ նվերներ ուղարկեց Սմբատին եւ հաշտվեց նրա հետ⁷⁶: 903 թ. Սմբատ Ա.-ի դեմ ելույթ ունեցավ Սյունյաց Սմբատ իշխանը, որն ամրացավ Վայոց ձորի ամրոցներում, սակայն Վասպուրականի Աշոտ իշխանի միջնորդությամբ Սմբատը հնազանդվեց⁷⁷: Թերեւս Սյունյաց իշխանին հայոց թագավորի դեմ էր տրամադրել Յուսուֆը, բայց քանի որ նա հաշտվել էր Սմբատ Ա.-ի հետ, Սմբատ Սյունեցուն, բացի հնազանդվելուց, այլ բան չէր մնում:

Այնուհետև Հովհաննես Դրասխանակերտցին ներկայացնում է երկրի խաղաղ բարգավաճումը՝ մինչեւ այն ժամանակները, երբ Վիրք ու Գուգարք ներխուժեց արխազաց Կոստանդին Գ. թագավորի (893-923) զորքը: Սմբատի զորքն արագ արշավանքի դուրս եկավ եւ ջախջախեց հակառակորդին՝ գերելով Կոստանդինին⁷⁸: Արխազական արշավանքը տեղի է ունեցել 906 թ.⁷⁹:

Արխազաց թագավորությունում, Կոստանդին Գ.-ի ձերբակալվելուց հետո, սկսում են մտածել նոր թագավորի մասին, ուստի Սմբատ Ա.-ն թագավորական ոսկե խույր է դնում Կոստանդին Գ.-ի գլխին, արքայական հագուստներ հագցնում եւ օգնական զորքով ուղարկում Արխազիա: Այնուհետև «ի բազում

73 Տե՛ս անդ, էջ 473:

74 Տե՛ս անդ, էջ 474-475: Ափշինի մահը Թովմա Արծրունին դնում է 898 թ. (Թովմա Արծրունի եւ Անանուն, էջ 376): Ըստ պատմիչի՝ Ափշինի մահից հետո միայն վախճանվեց Գետրգ Կաթողիկոսը: Արծրունյաց պատմիչի հաղորդումը պարունակում է ժամանակագրական սխալներ:

75 Հովհաննես Դրասխանակերտցի, էջ 477:

76 Տե՛ս անդ, էջ 478-480:

77 Տե՛ս Թովմա Արծրունի եւ Անանուն, էջ 382-384:

78 Տե՛ս Հովհաննես Դրասխանակերտցի, էջ 481-483:

79 Տե՛ս Ա. Եղիազարյան, Հայ Բագրատունիների տերությունը (885-908 թթ.), Երևան, 2011, էջ 58-61, նույնի՝ «Հայոց Սմբատ Ա. թագավորի արխազական արշավանքը». «Լրաբեր (հաս. գիտ.)», 2010, թ. 1-2, էջ 120-130:

հնազանդություն եւ մտերմական ծառայություն համախոհութեան զինքն (իմա՝ Կոստանդին Գ. - Ա. Ե.) արքային Սմբատայ բերէր սակս հայրաբուն նախախնամութեան նորա առ նա»⁸⁰:

Ըստ Հովհաննէս Դրասխանակերտցոյ՝ Ատրներսեհը չարացալ՝ կարծելով, որ դա ի հակադրություն իրեն է արվել, եւ սկսեց դավադրություն ծրագրել: Բայց Սմբատ Ա.-ն սկզբում լուրջ չէր վերաբերվում Ատրներսեհի դժգոհությանը, մինչեւ պարզվեց, որ հայ ազդեցիկ իշխաններից մեկը՝ Հասանը, որը ծրագրում էր սպանել նրան, դավադրության մեջ է ներքաշել Ատրներսեհին: Վերջինիս խոստացվել էր հայոց գահը⁸¹: Նրանց է միանում նաեւ Հավնունի իշխանը: Դավադիրների գորքը գալիս է Անի, որը հանձնվում է Ատրներսեհին, իսկ այնտեղից՝ մայրաքաղաք Երազգավորս եւ տեղավորվում արքունական ապարանքում: Սմբատ Ա.-ն, որ գտնվում էր Տաշիրքում, իմանում է այդ մասին եւ արշավում նրանց դեմ: Ատրներսեհն ու Հասանը, թալանելով Անիի ամրոցը, հեռանում ու ապաստանում են Տայքում: Դավադրության լուրը միավորում է բոլոր իշխաններին, որոնք գորքով հավաքվում են Սմբատ Ա.-ի շուրջը: Հայոց բանակը ներխուժում է Ատրներսեհի տիրույթներ, սակայն թագավորը հրամայում է անմեղներին չվնասել: Ատրներսեհը գալիս է Սմբատ Ա.-ի մոտ եւ ներում հայցում: Սմբատ Ա.-ն ներում է, սակայն նրա ավագ որդուն պատանդ վերցնում՝ որպէս հավատարմության գրավական: Սմբատ Ա.-ն Ատրներսեհի կողմնակից իշխաններին, որոնք, դատելով պատմիչի տեղեկություններից, Ատրներսեհի տիրույթներից էին («զնախարարսն զիւր առհասարակ ի նմանէ ի ձեռն առեալ»), կուրացնել է տալիս եւ մի մասին ուղարկում Բյուզանդիայի կայսերը, իսկ մյուս մասին՝ արխագաց թագավորին⁸²:

Ամենայն հավանականությամբ, դավադիրներն Ատրպատականի Յուսուֆ ամիրայի հետ գործակցել էին, քանի որ Հովհաննէս Դրասխանակերտցին հաղորդում է, որ դավադրությունը ծագել էր այն բանից հետո, երբ լարվել էին Սմբատ Ա.-ի ու Յուսուֆի հարաբերությունները, որը Հասանին եւ յուրայիններին վախ էր ներշնչել ապագայի վերաբերյալ⁸³:

907 թ. Գագիկ Արծրունին գրավեց Ամյուկ բերդը: Սմբատ Ա.-ն արշավեց դեպի Ամյուկ, գրավեց այն, իսկ հետո վաճառեց Գագիկին⁸⁴: Այս իրադարձությունը, ինչպէս նաեւ այն, որ նույն ժամանակ Սմբատ Ա.-ն մերժեց Գագիկի խնդրանքը՝ Նախճավանը նրան հանձնելու⁸⁵, հանգեցրեց նրան, որ Վասպուրականի իշխանն սկսեց փնտրել Ատրպատականի ամիրայի հովանավորությունը: Վերջինս ընդառաջ գնաց եւ 908 թ. թագադրեց նրան:

80 Հովհաննէս Դրասխանակերտցի, էջ 483:

81 Տե՛ս անդ, էջ 485-487:

82 Տե՛ս անդ:

83 Տե՛ս անդ:

84 Տե՛ս Թովմա Արծրունի եւ Անանուն, էջ 434-438:

85 Տե՛ս Հովհաննէս Դրասխանակերտցի, էջ 487:

Ըստ Ստեփաննոս Օրբելյանի՝ 908 թ. Վասպուրականի թագավորության ստեղծումից հետո տեղի է ունեցել Աղվանից եւ Կղարչքի իշխանների թագադրությունը⁸⁶: Այդ թվագրումը լիովին համապատասխանում է վերոհիշյալ դեպքերի ժամանակագրությանը: Փաստորեն, 908 թ. Յուսուֆը լուրջ քայլեր է կատարում Հայոց թագավորությունը մասնատելու եւ թուլացնելու ուղղությամբ: Այդ նպատակով նա թագադրում է Գագիկ Արծրունուն⁸⁷: Սյունյաց իշխանը Յուսուֆի առաջարկած թագից հրաժարվում է⁸⁸: Հույժ կարեւոր տեղեկություն է պահպանել Ասողիկը, որը, խոսելով 908 թ. իրադարձությունների մասին, տեղեկացնում է, որ Յուսուֆ ամիրայի մոտ «երթեալ Ատրներսեհ Վրաց թագաւոր եւ Գագիկ իշխան Վասպուրականի» ու այլ հայ իշխաններ⁸⁹: Փաստորեն, ի տարբերություն Հովհաննես Դրասխանակերտցու, համաձայն որի՝ Ափշինի մոտ գնացել է Գագիկ Արծրունին եւ թագ ստացել⁹⁰, Ասողիկը հաղորդում է, որ Յուսուֆի մոտ է գնացել նաեւ Ատրներսեհ Բագրատունին: Հայոց 358 թ. (909/910) Յուսուֆի արշավանքի հետեւանքով Հայոց թագավորը ստիպված ապաստանեց արխագաց թագավորությունում⁹¹: Յուսուֆի կողմից Ատրներսեհի թագադրությունը հիմնավորվում է թեկուզ այն փաստով, որ վերջինս թագ էր առաջարկել նաեւ Սյունյաց Վասակ իշխանին: Այսինքն՝ հայոց թագավորությունը մասնատելու առումով Յուսուֆի համար ոչ մի խնդիր չկար Գագիկ Արծրունուց եւ Վասակ Սյունուց բացի, թագ առաջարկել նաեւ Ատրներսեհին:

Թագեր բաժանելու միջոցով Հայոց թագավորությունը մասնատելուց հետո Յուսուֆը որոշեց մեծ արշավանք ձեռնարկել Հայաստան: Ըստ Հովհաննես Դրասխանակերտցու՝ Յուսուֆը Հայաստան է արշավել հայոց 358 թվականին, այսինքն՝ 909 թ. ապրիլից մինչեւ 910 թ. ապրիլն ընկած ժամանակահատվածում⁹²: Ըստ որում՝ արշավանքը սկսվել է 909 թ. գարնանը⁹³, քանի որ պատմիչը հստակ ընդգծում է, որ դրա նախորդ տարին՝ 908 թ., Վասպուրականի Գագիկ Արծրունի իշխանը Յուսուֆի կողմից թագադրվել էր որպես հայոց թագավոր⁹⁴: 909 թ. ամռանը Յուսուֆի զորքերը հետապնդում են Սմբատ Ա.-ին, որը հեռացել էր Կղարչք, իսկ աշնանը հաստատվել Դվինում՝ ձմեռն այնտեղ անցկացնելու նպատակով⁹⁵: Միեւնույն ժամանակ Սմբատ Ա.-ն վերադառնում է Երազգավորս⁹⁶: Սմբատ Ա.-ի նահանջի ժամանակ Հովհաննես

86 Տե՛ս Ստեփաննոս Օրբելյան, էջ 299:

87 Տե՛ս Հովհաննես Դրասխանակերտցի, էջ 487-488:

88 Տե՛ս Ստեփաննոս Օրբելյան, էջ 299:

89 Տե՛ս Ասողիկ, էջ 744:

90 Տե՛ս Հովհաննես Դրասխանակերտցի, էջ 487-488:

91 Տե՛ս Ասողիկ, էջ 744. «Քարթլիի Մատյան», էջ 66:

92 Տե՛ս Հովհաննես Դրասխանակերտցի, էջ 489-490:

93 Տե՛ս անդ, էջ 489:

94 Տե՛ս անդ, էջ 487:

95 Տե՛ս անդ, էջ 490-491:

96 Տե՛ս անդ, էջ 492:

Դրասխանակերտցին հեռացել էր Աղվանից թագավորություն: Հաջորդ՝ 910 թ. գարնանը Յուսուֆը գործ է ուղարկում Սմբատ Ա.-ի դեմ, որոնց միանում են Գագիկ Արծրունու գնդերը: Սմբատ Ա.-ի գործը ղեկավարում էին որդիները՝ Աշոտն ու Մուշեղը: Ճակատամարտը տեղի է ունենում Նիգ գավառի Ջկնավաճառ կոչվող վայրում եւ ավարտվում Սմբատ Ա.-ի գործի պարտությամբ: Աշոտը փրկվում է, իսկ Մուշեղը՝ գերի ընկնում⁹⁷: Այնուհետեւ սկսվում են Յուսուֆի գործերի ասպատակությունները: Սմբատն ամրանում է Կապույտ բերդում⁹⁸, իսկ երկրում ազատագրական պայքար է սկսվում: Դրանից դրդված՝ Յուսուֆը Գագիկ Արծրունուն ուղարկում է Վաղարշակերտ ամրոցը գրավելու: Գագիկը, մեծ կորուստներ տալով, անհաջողության է մատնվում⁹⁹: Աստղիկի տեղեկություններով՝ Գագիկի հարձակումը Վաղարշակերտի վրա տեղի է ունեցել 363 թ. (914/915), իսկ Սմբատ Ա.-ի մահը՝ 364 թ. (915/916)¹⁰⁰: Ակնհայտ է, որ պատմիչի նշած թվականներն իրականությանը չեն համապատասխանում, սակայն կարելի է, որ պատմիչն այդ երկու իրադարձությունը դնում է իրար հաջորդող թվականների միջեւ, այսինքն՝ Վաղարշակերտի դեպքերից մինչեւ Սմբատ Ա.-ի մահը կազմում է մեկ տարուց ոչ ավելի:

Հստակեցնելով, որ Վաղարշակերտի պաշարումը տեղի է ունեցել ամենայն հավանականությամբ 912 թ.՝ կարող ենք նկատել, որ Ջկնավաճառի ճակատամարտից հետո սկիզբ առած ազատագրական պայքարը, որը խիստ անհանգստացրել էր Յուսուֆին¹⁰¹, ճնշելու նպատակով վերջինս փորձել է օգտագործել իր իսկ կողմից Հայոց թագավոր հռչակված Գագիկին:

Ըստ Հովհաննես Դրասխանակերտցու՝ Բյուզանդիայի կայսր Բարսեղը, իսկ իրականում՝ Լեոն Զ.-ն (886-912)¹⁰² ցանկացավ օգնության գալ Սմբատին, բայց վախճանվեց, իսկ նրան փոխարինած Ալեքսանդրը (912-913), որը զբաղված էր ծագած խռովությունները ճնշելով, Սմբատին օգնելու մասին մտածել չէր կարող¹⁰³: Նույն ժամանակ Կապույտ բերդում ամրացած Սմբատին Յուսուֆը 912 թ. խաբեությամբ գերեց եւ շուրջ մեկ տարի կտտանքների ենթարկեց¹⁰⁴: Այդ ընթացքում Սմբատին իր հետ վերցնելով՝ Յուսուֆը փորձ կատարեց գրավելու Երնջակ ամրոցը, բայց անհաջողության մատնվեց եւ 913 թ. հրամայեց հայոց արքային տանջամահ անել¹⁰⁵: Քանի որ Հովհաննես Դրասխանակերտ-

97 Տե՛ս անդ, էջ 492-493. Աստղիկ, էջ 745:

98 Տե՛ս Աստղիկ, էջ 745:

99 Տե՛ս Հովհաննես Դրասխանակերտցի, էջ 493-500:

100 Տե՛ս Աստղիկ, էջ 745:

101 Տե՛ս Հովհաննես Դրասխանակերտցի, էջ 492-493:

102 Հ. Բարթիկյանը կարծում է, որ Հովհաննես Դրասխանակերտցին «բասիլես»՝ «թագավոր» բառը սխալմամբ Բարսեղ ձևով է ներկայացրել. տե՛ս Հ. Բարթիկյան, Կոստանդնուպոլսի պատրիարք Նիկողայոս Միստիկոսի 101-րդ եւ 139-րդ թղթերը՝ ուղղված Հովհաննես Դրասխանակերտցուն եւ Սմբատ Ա. թագավորին. «ԴԲՀ», 1966, թ. 4, էջ 251, ծանոթ. 3:

103 Տե՛ս Հովհաննես Դրասխանակերտցի, էջ 502: Ն. Ադունցը կարծում է, որ իրականում Սմբատը Բյուզանդիայից օգնություն չի խնդրել. տե՛ս Ն. Ադունց, Երկեր. հ. Ե., էջ 192:

104 Տե՛ս Հովհաննես Դրասխանակերտցի, էջ 502-504:

105 Տե՛ս անդ, էջ 504-506:

ցին հատակորեն նշում է, որ Սմբատ Ա.-ին օգնել չկարողացան են Լեւոն Զ. և Ալեքսանդր կայսրերը¹⁰⁶, եւ դրանից հետո Սմբատ Ա.-ն գերվեց ու շուրջ մեկ տարի կտտանքների ենթարկվելով՝ սպանվեց, կարող ենք նշել, որ Սմբատը գերվել է 912 թ.: Ավելին, Բյուզանդիայից օգնություն խնդրելուց հետո կայսրը ոչ ուղղակի, այլ Կոստանդնուպոլսի Նիկողայոս Միստիկոս պատրիարքի միջոցով պատասխանել է Սմբատ Ա.-ին: Սակայն պատասխանը, որն ուղարկվել է, ըստ Հ. Բարթիկյանի ճշգրտման՝ 913 թ.¹⁰⁷, խիստ ուշացած է եղել, քանի որ Սմբատ Ա.-ն հայտնվել էր գերության մեջ:

Այժմ մնում է միայն քննարկել գլխավոր հարցը՝ Սմբատ Ա.-ի թագավորության տարիների քանակի խնդիրը: Ճշգրտելով, որ նա գահ է բարձրացել 891 թ. եւ սպանվել 913 թ., կարող ենք հիմնավոր համարել Հովհաննես Դրասխանակերտցու այն տեղեկությունը, որ Սմբատ Ա.-ն թագավորել է 22 տարի: Սակայն 891-913 թթ. միջակայքը կազմում է ավելի քան 22 տարի: Հայտնի է, որ իր կյանքի վերջին գրեթե մեկ տարին Սմբատ Ա.-ն անցկացրել է գերության մեջ: Հնարավոր է, որ Հովհաննես Դրասխանակերտցին գերության շրջանը հայոց թագավորի գահակալության տարիների մեջ պարզապես չի հաշվարկել:

Ամփոփելով քննությունը՝ կարող ենք նշել, որ Սմբատ Ա.-ն գահ է բարձրացել 891 թ. ապրիլից հետո՝ Աշոտ Ա.-ի մահից կարճ ժամանակ անց՝ թագավորելով 22 տարի՝ մինչեւ 913 թ.: Սմբատի օրոք տեղի են ունեցել մի շարք իրադարձություններ, որոնց թվագրումը նախկինում կատարվել է նրա թագավորության՝ ավանդական 890-914 թթ. թվագրման շրջանակներում: Նա 892 թ. բարելավել է հարաբերությունները Բյուզանդիայի հետ՝ կնքելով առեւտրային պայմանագիր, եւ պարտության մատնել Դվինի արաբներին, իսկ 893 թ.՝ նվաճել Այսրկովկասի երկրները: Դվինի երկրաշարժը տեղի է ունեցել 894 թ., եւ նույն թվականին էլ՝ Դոդսի ճակատամարտը: Թուղխի ճակատամարտը տեղի է ունեցել 897 թ.: Ատրպատականի Ափշին ամիրան մահացել է 901 թ., իսկ նրան հաջորդած Յուսուֆը Հայաստան է արշավել 902 թ.: Յուսուֆն ու Սմբատ Ա.-ն հաշտվել են 903 թ., եւ Հայաստանում 3 տարի խաղաղություն է հաստատվել: 906 թ. Սմբատ Ա.-ի զորքը ջախջախել է աբխազաց թագավորի բանակը, որից երկու տարի անց երկրում պառակտում է սկսվել: 908 թ. Ափշինը թագադրել է Վասպուրականի Գագիկ Արծրունի իշխանին, իսկ 909 թ.՝ ներխուժել հայոց թագավորություն: 910 թ. Նիգ գավառում տեղի ունեցած ճակատամարտում Սմբատի բանակը պարտություն է կրել, իսկ 912 թ. Սմբատը գերվել է: Նա սպանվել է 913 թ.՝ շուրջ մեկ տարի գերության մեջ անցկացնելուց հետո:

106 Տե՛ս Թեոփանեսի Շարունակող. Օտար Աղբյուրները Հայաստանի եւ հայերի մասին, 15, Բյուզանդական աղբյուրներ, Ե., թարգմանություն բնագրից, առաջաբան եւ ծանոթագրություններ՝ Հ. Բարթիկյանի, Երևան, 1990, էջ 223-224:

107 Տե՛ս Հ. Բարթիկյան, նշվ. աշխ., էջ 251-256: